





元和郡縣圖志卷第九

河南道五



徐泗州節度使

徐州

宿州

泗州

濠州

蔡州節度使

蔡州

申州

光州

徐州

上彭城

開元戶四萬九千七百二  
元和戶三千八百五十八

鄉九十二  
鄉八十九

令為徐泗節度理所

管州四

徐州

宿州

泗州

濠州

縣一十六

都管戶三萬七  
千二百五十二

本禹貢徐州之域春秋時為宋滕薛小邾偃陽之地六國時屬楚秦并天下為泗水郡楚漢之際楚懷王自盱眙徙



都之後項羽遷懷王於郴自立為西楚霸王又都於此漢改泗水郡為沛郡又分沛郡立楚國按楚國即今州理是也宣帝地節元年更為彭城郡尋復為楚國自漢以來或理彭城理下邳晉氏南遷又於淮南僑立徐州安帝始分淮北為北徐州宋永初二年加淮南徐州曰南徐州而改北徐州曰徐州明帝時淮北入魏梁初暫收太清之後尋復入魏徐州復理彭城仍立彭城郡高齊及後周不改隋開皇二年於此置總管罷郡其所領縣並屬徐州十四年廢總管府為彭城郡隋亂陷賊武德四年討平王充改置徐州總管府七年改為都督貞觀十七年罷都督初宋高

祖經畧中原以彭城險要置府於此至文帝時王玄謨又上表曰彭城南界大淮左右清汴城隍峻整襟衛周固自淮已西襄陽已北經塗三千達於齊岱六州之人三十萬戶常得安全實由此鎮後魏大將軍尉元上表曰彭城宋之要藩南師來侵莫不用之以陵諸夏輿地志云郡城由來非攻所能拔按自隋氏鑿汴已來彭城南控埧橋以扼汴路故其鎮尤重

州境

東西二百六十九里  
南北六百八十九里

八到

西至上都二千八十里  
西至東都一千二百二里

南取埧橋路至定州五百里  
西南取蕭縣路至宋州三百十里



西南至濠州三百九十里  
西北至兗州三百四十里  
取埭橋路

東南至泗州五百九十里  
東北至沂州三百五十里

貢賦

開元貢五色土各一斗  
上細絹賦用綿絹

管縣五

彭城

蕭縣

豐縣

沛縣

滕縣

彭城縣 望郭下

古大彭氏國也漢為彭城縣屬楚國後漢屬

彭城國宋屬彭城郡隋文帝罷郡為縣屬徐州

定國山在縣東四里魏武定五年慕容紹宗欲擊梁貞陽

侯蕭明營於此山

泗水在縣東去縣十步

州理城貞觀五年築其外城即古大彭氏國漢高祖定天

下以為楚國封弟交為楚王東晉封劉裕為宋公至宋武

武帝以皇子義康為彭城王並都於此後宋平北將軍徐

州刺史薛安都乃舉城歸魏

呂梁故城在縣東五十七里春秋時宋之呂邑至漢以為

呂縣城臨泗水高百四十尺周迴十七里此城東二里有

三城一在水南一在水中潭上一在水北並高齊所築立

鎮以防陳寇

曹公故城在縣東南六十五里在呂梁東岸或言曹公築

此以守呂布西岸有城臨水是布之所固也號曰呂布固

故垓城在縣北二十六里或曰古崇侯國兗州人謂實中



城曰垓

戲馬臺在縣東南二里項羽所造戲馬於此宋公九日登戲馬臺即此也

寒山堰在縣東南一十八里梁蕭明伐魏堰清水以灌彭城呂梁在縣東南五十七里蓋泗水至呂縣積石為梁故號呂梁陳將吳明徹以舟師北破下邳進屯呂梁堰泗水以灌徐州周將軍烏丸軌達奚長儒率兵救援軌取車輪數百連鑱貫之橫斷水路然後募壯士夜決堰至明陳人始覺潰亂爭歸至連鑱之處生擒明徹

蕭縣

上

東北至州六十里

本古之蕭國春秋時宋邑漢蕭縣屬沛郡北齊改為承高縣屬彭城郡開皇三年罷郡屬徐州改為龍成縣尋復為蕭縣

丁公山在縣東南二十里丁固追漢高帝處

緩與山在縣東二十五里宋高祖緩與里人蓋因里以名山也

胥井在縣北二百步左傳楚子伐蕭還無社與司馬言因於胥井而拯之即此也

豐縣

上

東南至州一百七十五里

本漢舊縣屬沛郡戰國屬梁後漢屬沛國晉同宋改屬北

元朝郡縣志

卷九

三



濟陰郡北齊改郡永昌以縣屬焉隋改屬徐州  
豐西澤在縣西十五里漢高帝斬白蛇於此

沛縣上 東南至州一百四十三里

本秦舊縣泗水郡理於此蓋取沛澤為縣名漢興四年改名沛郡領三十七縣理相成以此為小沛魏分立譙郡又以沛為王國晉不改宋為沛縣改屬徐州隋文帝罷郡縣屬仍舊

微山上有微子冢去縣六十五里

泗水西北流入北去縣五十步

泡水即豐水也西去縣百五十步

縣理城即秦沛縣城也初陳涉起沛令欲以沛應之乃令樊噲召高祖沛令後悔閉城拒守高祖書帛射城上曰諸侯並起今屠沛父老乃殺沛令迎高祖立為沛公十二年高祖破黥布還過沛謂沛父老曰遊子悲故鄉吾雖都關中萬歲後吾魂魄猶思樂沛且朕自沛公以誅暴亂其以沛為朕湯沐邑

故留城在縣東南五十五里高祖令張良自擇齊三萬戶良曰始臣起于下邳與陛下會留乃封良為留侯故沛宮在縣東南一里高祖過沛置酒歌大風即此宮也  
泗水亭在縣東一百步高祖微時為亭長於此



滕縣 上 南至州二百里

本古滕國漢蕃縣也屬魯國宋屬彭城郡漢末太傅陳蕃子逸為魯相改音皮後魏置蕃郡以縣屬焉北齊郡縣並廢隋於此置滕縣屬徐州按古滕縣國在縣西南十四里滕城是也

奚公山在縣東南六十六里奚仲初造車於此處

公丘故城在西南十五里夏侯嬰初為滕令故號滕公按此時高祖未立屬縣故滕為秦縣至武帝改為公丘縣屬沛國

故薛城在縣東南四十三里薛侯國也孟嘗君時薛中六

萬家其中高厚天下無比此田文以抗禦楚魏也合鄉故城在縣東二十三里即論語所謂互鄉是也

宿州 符離 元和戶八千六百七十六 鄉三十六

本徐州符離縣也元和四年以其地南臨汴河有埭橋為舳艫之會運漕所歷防虞是資又以蘄縣北屬徐州疆界闊遠有詔割符離蘄縣及泗州之虹縣置宿州取古宿國為名也

州境 東西南北

八到 西北至上都一千九百里 西北至東都一千四百里

東南至泗州四百二十里 東南至淮百里與濠州分中流為界從界至濠州一



百里  
北至徐州一百五十里  
西至宋州三百三十里

貢賦 開元貢

管縣三

符離

蘄縣

虹縣

符離縣

上

北至州一百五十里

本秦舊縣漢屬沛郡高齊時屬睢南郡開皇三年罷郡以縣屬徐州爾雅曰莞符離也以地多此草故縣取名

睢水自縣西北流入

故相城在縣西北九十里蓋相土舊都之所

靈壁故城在縣東北九十里漢二年漢王入彭城項羽以

精兵三萬人晨擊漢軍於靈壁東睢水上大破之睢水為之不流

鄆縣

上

北至州二百三十二里

本秦舊縣漢屬沛郡後

漢屬沛國有大澤鄉陳涉起兵於此為狐鳴宋於此置譙

郡齊以為北譙郡後魏改蘄縣為蘄城縣隋開皇三年去

城字屬仁州

即今宿州蘄縣是也

大業二年屬徐州八年屬譙州七

年復隸徐州

淮水西南流入經縣南七十里

渙水西自臨渙縣界流入

渦水南去縣一百里

蘄水去縣三十里



虹縣 上 西至州二百里

本漢舊縣屬沛郡虹音貢漢書作虹字梁武帝於此置貢城戍後魏復置虹縣周大象中省以地屬晉陵縣開皇十八年改晉為夏丘縣武德四年於今縣南百里故虹城重疊置虹縣屬仁州貞觀八年屬泗州貞觀十三年移今理縣臨汴河

赤坎故城在縣西南五十九里梁天監八年置赤坎戍潼陂一名萬安湖周迴二十里在縣北五里

垓下聚在縣西南五十四里漢高祖圍項羽於垓下大破之即此地也按漢浹縣屬沛郡垓下即浹縣之聚落名也

浹音絞圖經云項羽墓在縣南六里按羽死後高祖以魯公禮葬羽於穀城在今鄆州東阿縣界言在此俗說之謬也

廣濟渠按開元二十七年河南採訪使齊澣以江淮運漕經淮水波濤有沉溺之憂遂開廣濟渠下流自虹縣至楚州淮陰縣北十八里合於淮踰時畢功後以水流峻急行旅艱阻旋又停廢却由舊河

泗州 臨淮 開元戶三萬三百五十 元和戶四千一十五 鄉六十

禹貢徐州之域春秋時屬魯又為徐子之國後為楚所滅秦為泗水郡地漢興改泗水為郡武帝分置臨淮郡後漢



下邳太守理此自晉迄後魏並為宿預縣後魏於此置東  
徐州周宣帝大象二年改為泗州大業三年改為下邳武  
德四年復為泗州開元二十三年自宿遷縣移於今理

州境東西三百八十五里  
東北三百七十九里

八到西北至上都二千三百二十里  
西北至東都一千四百七十里  
東南陸行至揚州二百七十三里  
東水路至楚州二百二十里

西南至濠州二百一十里  
西北至埧橋四百二十里

貢賦開元貢  
賦  
麻布  
細澣布

管縣五 臨淮 宿遷 徐城 漣水 下邳

臨淮縣緊郭下

本漢徐縣地長安四年分徐城南界兩鄉於沙塾村置臨  
淮縣南臨淮水西枕汴河開元二十三年自宿遷移於今

理

宿遷縣上南至州二百一十里

春秋時宋人遷宿之地至漢為朐猶縣屬臨淮郡晉安立

宿預縣開皇三年屬泗州寶應元年以犯代宗廟諱改為

宿遷縣

淮水入縣境南與楚州山陽縣分中流為界

舊州城梁將張惠紹北入軍所次憑固斯城塹其羅引水

環之今城在泗水之中



下相故城在縣西北七十里秦故縣也項羽即下相人也  
應劭曰相水出沛國亦曰下相

魯肅廟在縣東南一里肅臨淮人後人爲之立廟

徐城縣中 東至州五十里

本徐子國也周穆王末徐君偃好行仁義視物如傷東夷  
歸之者四十餘國穆王聞徐君威德日遠乘八駿之馬使  
造父御之發楚師襲其不備大破之殺偃王其子遂北徙  
彭城原東山之下百姓歸之號曰徐山按山今在下邳縣  
界楚漢之際項羽置東陽郡漢誅英布置徐縣屬臨淮郡  
後漢以臨淮郡合於東海明帝又分東海為下邳國理於

此晉太康三年復置徐縣屬臨淮郡梁於此置高平郡及  
高平縣開皇十八年改爲徐城縣泗州理大徐城大業四  
年移於今理

淮水西南自虹縣界流入

永泰湖縣南二里周迴三百六十三里其中多魚尤出朱  
衣付

大徐城在縣北三十里

徐君墓在縣北三十二里李札掛劍處

連水縣上 西至州一百六十里

本漢朐猶縣之地後漢爲徐縣之地晉爲宿遷縣之境宋



明帝於此置東海郡又於城北置襄贛縣屬焉後魏改為海安郡開皇三年廢郡以縣屬海州五年改襄贛為漣水縣因縣界有漣水為名武德四年置漣州縣屬焉貞觀元年廢漣州縣屬泗州

海水在縣東北一百四里

淮水西南自宿遷縣界流入

沐水俗名漣水西南自海州沐陽縣流入

碩濩湖在縣北百一十六里與海州朐山縣中分為界

下邳縣

上

東南至州一百七十五里

本夏時邳國後屬薛左傳薛之祖奚仲遷於邳是也春秋

併於宋戰國時屬楚後屬齊至秦曰下邳縣漢屬東海郡魏志曹公征呂布於下邳生擒布令東中郎將鎮下邳宋改為下邳縣屬東徐州周改東徐為邳州隋省邳州以縣屬泗州

嶧陽山在縣西六里

泗水西自彭城縣界流入

淮水自縣西流入去縣六十里

沂水經縣北分為二水一水於城北西南入泗一水經城

東屈曲從縣南亦注泗謂之小沂水水上有橋昔張子房

遇黃石公於圯上即此處也南人謂橋為圯故郟城在縣



東北一百五十里古郟子國城孔子問鳥官於郟子即此地也

縣理城古邳國城也魏武征呂布於下邳決泗水引沂水以灌其城即此處也按下邳城有三重大城周迴十二里半中城周四里呂布所守也魏武擒布於白門即大城之門也小城累塼堅峻周二里許西南又有一小城周三百七十步征虜將軍石崇所築也石鼈屯晉穆帝升平初荀羨為北部都尉鎮下邳起田於東陽之石鼈在縣臨津郡界公私利之北齊廢帝乾明中尚書在丞蘇珎芝又議修石鼈等屯歲收數十萬石自是淮南軍防糧儲充足

濠州

上鍾離

開元戶二萬五百五十二元和戶二萬七百二

鄉四十一鄉四十二

禹貢揚州之域春秋時為鍾離子之國後為吳楚所爭之地左傳楚子為舟師以畧吳疆滅鍾離又史記楚平王時鍾離人與吳邊邑畢卑梁小僮爭桑而二邑交相攻滅秦并天下屬九江郡漢置鍾離縣復隸九江郡晉立為鍾離郡宋因之宋明帝失淮北地復立徐州於此後廢帝改號北徐州梁因之以昌義之為北徐州刺史鎮鍾離魏鍾山王元英將軍楊大眼率衆數千萬來寇鍾離城北阻淮水魏人於州東邵揚州作浮橋晝夜攻城分番相代義之善射每彎弓所向莫不應弦而倒一日戰數十合魏軍死者



與城中平會高祖遣曹景宗韋叡二十萬來救魏軍大敗  
 英與大眼脫身而走因輕騎追至洛口州後入高齊文宣  
 帝改爲西楚州隋開皇三年改濠州因水爲名大業三年  
 改爲鍾離郡南北朝皆爲重鎮隋亂陷賊武德五年杜伏  
 威附改爲濠州按濠州本屬淮南與壽陽阻淮帶山爲淮  
 南之險貞觀元年竇參爲相於是據淮割地隸屬徐州及  
 徐州節度使張建封死子愔爲本軍所立常挫王師其時  
 朝廷幾失淮南之地蓋參不學無術昧於疆理之制所由  
 致也自貞元以後州西渦口對岸置兩城刺史常帶兩城  
 使以守其要濠字中間誤去水元和三年字又加水焉

州境 東西二百六十里 南北一百八十一里

八到 北取虹縣路至上都二千三百七十五里 西北至東都一千五百一十里

東北至楚州肝胎縣二百二十里 從縣至楚州一百九十里

西南至壽州二百二十里 東南至滁州二百三十里

南至廬州三百三十里 東北至泗州三百二十里

西北至徐州四百五十里

貢賦 開元貢 官絕 綿布

管縣三 鍾離 定遠 招義

鍾離縣 上郭下

本漢舊縣屬九江郡至晉屬淮南郡安帝時因東郡燕縣



流人在鍾離者於此置燕縣至高齊復爲鍾離縣  
塗山在縣西九十五里

淮水西南自壽州界流入

西濠水出縣西南莫邪山北入淮

東濠水出縣南濠塘山東北入淮

當塗縣故城本塗山氏國在縣西南百一十七里禹娶於  
塗山即此也

荆山堰在郡城西首一十二里梁天監十四年魏降人王  
足陳計於武帝求堰淮水以灌壽陽引北方童謠曰荆山  
爲上格浮山爲下格潼泡爲激溝并灌鉅野澤帝遂發徐

徐陽人率二十戶取五丁以築之令太子右衛率康絢左  
衛將軍昌義之護作令戰士二十萬人於鍾離南起浮山  
堰北抵巉石至十四年四月堰將合淮水漂度輒復決潰  
或言江淮多蛟龍其性惡鐵於是東西二冶故鐵器大則  
釜鬲小則鏝鉏數千萬斤沉於堰所猶不合緣淮百里內  
木石皆盡負者肩上皆穿士卒死者十七八五年四月堰  
乃成壽陽城戍移頓於八公山淮水清人之墳墓皆歷歷  
見於水底或謂絢曰四瀆者天地所以節宣其氣不宜久  
塞旣而昏霧三日霧解而堰決殺數萬人其聲若雷聞於  
三百里水中怪物隨流而下或人頭魚身龍形馬首殊類



詭怪不可勝言

莊周臺在縣西南七里濠州水經其前莊子與惠子觀魚之所又云觀魚臺

定遠縣 上 北至州一百里

本漢東城縣地屬九江郡梁武帝天監初置屬定遠郡高齊改爲大安郡仁壽元年廢郡改定遠縣爲臨濠縣屬濠州國朝復爲定遠縣

浴水經縣西四十里

陰陵縣故城在縣西北六十五里本漢縣也項羽敗於垓下將麾下八百騎潰圍南走灌嬰追羽至陰陵羽迷失道

問田父田父給曰在左乃陷大澤以故漢兵及之

東城縣故城在縣東南五十里項羽自陰陵至此尚有二十人騎南走至烏江亭灌嬰等追羽楊善斬羽於東城即此地也

招義縣 上 西至州一百四十里

本漢淮陵縣屬臨淮郡後漢屬下邳郡宋孝武自淮北徙睢陵縣改爲池南縣陳爲招義縣大業元年爲化明縣屬濠州武德七年更名招義縣

淮水西自鍾離縣界流入

浮山堰在縣西北六十里梁天監十三年與荆山堰同時



修築

蔡州

緊汝南

開元戶五萬一千二百一十  
元和戶一萬二百六十三

鄉一百七

今為蔡州節度理所

管州三

蔡州

申州

光州

縣十二

古豫州之域春秋時為蔡江黃道柏胡蓼沈頓項息房呂十三國之地七國時屬魏秦兼天下為三川河東南陽潁川碭泗水節七郡之地漢立汝南郡領二十七縣理平與宋元嘉中後魏太武率兵圍汝南郡太守陳憲守拒四十餘日魏人積屍與城齊不拔而退宋文帝又於懸瓠城今理置司州其後太武收河南地獻文改司州為豫州周大象

二年改為舒州隋文改為豫州移入懸瓠城今理是也仁壽四年改為溱州大業二年改蔡州三年罷州為汝南郡武德四年復置豫州寶應元年以避代宗廟諱復改為蔡州

州境 東四百一十七里  
西四百一十三里  
南四百一十三里  
北四百一十三里

八到 西北至上都一千四百三十里  
西北至東都六百二十里  
南至申州二百五十里  
西至唐州二百一十里  
東北至陳州二百二十里  
北至潁州三百六十里  
東南至光州三百二十里

貢賦 開元貢 龜甲 雙鷄 鵝 綾 長安四年改為四窠 雲綾



管縣十二 汝南 汝陽 平輿 吳房

西平 朗山 新息 真陽

上蔡 新蔡 褒信 鄆城

汝南縣 望郭下 管四界

本漢舊縣也屬汝南郡晉屬汝南國宋屬汝陽郡隋開皇二年罷郡縣屬豫州仁壽四年改豫州為濠州以縣屬焉大業二年又移於今理屬蔡州

汝水經縣西南二里

州理城古懸瓠城也汝水屈曲形若垂瓠故城取名焉平

與故城漢縣也古沈子國在縣東北六十里

鴻郟陂在縣東十里成帝時陂溢為害翟方進為丞相以

為決去陂水其地肥美省隄防之費遂奏罷之王莽時嘗

枯旱郡人追怨方進童謠曰壞陂誰翟子威飯我豆食羨

成芋魁反手覆陂當復誰者云兩黃鵠及建武中太守鄧

晨使許陽為都水掾令復鴻郟陂陽曰昔成帝夢上天天

帝怒曰何故壞我濯龍池於是乃回高下形勢起塘四百

餘里數年乃立今廢

平輿縣 中西至州六十二里

本漢平輿縣地屬汝南郡高齊廢大業二年重置十三年



陷王世充置輿州管平輿一縣武德中屬蔡州貞觀元年廢天授二年重置

汝水在縣南四十二里

葛陂周迴三十里在縣東北四十里費長房投杖成龍處

吳房縣上東南至州九十里

本漢舊縣屬汝南郡後魏置襄城郡仍立遂寧縣以屬焉隋改為濯陽縣大業二年改為吳房縣

西平縣上東南至州一百五十里

本漢舊縣屬汝南郡後魏置即春秋時柏國也古韓地之分蘇秦說韓王曰韓有劔戟出於棠谿今此縣西界有棠

谿村是也縣又有龍泉水可以淬刀劔自漢至後魏皆為

西平縣地隋末廢天授三年復置

朗山縣上東北至州九十一里

本漢安昌縣地屬汝南郡漢省後魏太武真君二年於朗陵故城復置隋開皇三年移於今理屬豫州十六年改為

朗山縣

朗陵山一名大朗山在縣西北三十里

淮水經縣理南去縣一百二十里

道城古道國也在縣東北二十里

朗陵故城漢縣也在縣西南三十五里晉何曾所封之邑



也

四望故城在縣東南七十里後魏太和十一年豫州刺史王肅於四望陂南築之以禦梁梁太清二年豫州刺史羊雖仁以二魏交逼糧運懸斷乃棄懸瓠歸於義陽上表曰臣輒率所領縮還舊鎮仍留夏紹等停四望城防備即此城也

新息縣

上西北至州二百里

本息侯國為楚所滅漢以為新息縣屬南郡周武帝於此置息州領此縣隋大業二年州廢改屬豫州武德四年於此重置息州貞觀元年廢以縣屬豫州

淮水自西流入經縣南去縣五里

汝水自西流入經縣北去縣八十里

王梁渠在縣西北五十里隋仁壽年修築開元中縣令薛務更加疏導兩岸通管陂一十六所利田三千餘頃

珉玉坑在古息城東南五步周迴一百八十步深三尺其玉顏色潔白堪為器物隋朝官採用貞觀中亦令採取其後為淮水所沒開元中淮水東移珉坑重出其玉溫潤倍勝昔時蔡州至今以為厥貢之首

賈君祠在縣北一里名彪字偉節後漢時為新息長人例不養子彪巖其制所活數千僉曰賈父後為立祠



新息故城在縣西南十里

真陽縣中 北至州一百里

本漢慎陽縣屬汝南郡晉汝南國後魏改為真陽縣高齊改為保城縣開皇十六年改置真丘縣大業二年復為真陽縣因慎水為名也

淮水經縣南去縣八十里

慎水出縣西南二十里

上蔡縣上 南至州七十里

本漢舊縣也古蔡國晉上蔡縣屬汝南國後魏神龜三年於此置臨縣高齊廢隋文開皇十二年移於今理為上

蔡縣

蔡崗在縣東十里周迴五十里

汝水西去縣十五里

新蔡縣上 西北至州一百五十里

本漢舊縣古呂國也漢屬汝南郡晉屬汝陰郡宋屬新蔡郡東魏孝靜帝於此置蔡州開皇十六年於此置舒州領大寧縣仁壽二年改縣為汝大業二年改為新蔡縣屬蔡州

汝水經縣南去縣

褒信縣中 西北至州一百八十里



本漢郟縣之地後漢分立褒信縣屬汝南郡晉屬汝陰郡  
宋改為褒信縣大業二年改褒信縣屬蔡州

淮水縣南去縣七十五里

汝水經縣東北去縣五十五里

白亭在縣東南四十二里左傳楚白公勝所封之地

郟城縣緊東南至州一百八十里

本漢七國時魏之下邑史記楚昭陽伐魏取郟兩漢以為  
縣屬潁川郡光武謂賈復曰郟最大宛次之復曰臣請擊  
郟帝執復手曰執金吾擊郟吾復何憂謂此城也宋元嘉  
二年將軍劉緬說曰郟城有百年之福若北朝保之未可

敵也遂遣將軍殷祖焚其倉糧高齊於今縣置臨潁郡開  
皇三年廢五年又於廢郡城中置郟城縣屬許州武德四  
年於此置道州貞觀元年廢以縣屬豫州

汝水經縣西北去縣七十八里

大澗水上承汝水自襄城至歧額城分流南為汝水北為  
澗水

小澗水縣西北六十里至縣合為大澗水

邵陵故城在縣東四十五里春秋齊桓公帥諸侯之師盟  
於邵陵此其處也漢置邵陵縣屬汝南郡隋廢入郟城  
征羌故城在縣東南七十五里本秦安陵縣建武十二年



來歙征西羌有功故改名以封之

申州中義陽本屬淮南道貞元已後隸蔡州節度

開元戶二萬一千二十  
元和戶六百一十四  
鄉四十二  
鄉二十一

禹貢荊州之域又古申國也鄭武公娶于申曰武姜在周

為侯伯後為楚所滅秦并天下屬南陽郡魏文帝分置義

陽縣自後省置不常宋元嘉末於此立司州自後入後魏

為郢州入梁為司州周武帝平齊改為申州大業二年改

為義州武德四年復置申州

州境東西南北二百七十八里

八到西北至東都九百四十二里

東北至光州	二百六十里
南至安州	二百六十里
西北至唐州	二百六十里
西南至隨州	二百三十里
北至蔡州	二百八十里

貢賦 開元貢 葛十疋 紵 綿 絹

管縣三 義陽 鍾山 羅山

義陽縣郭上下

本漢平氏縣義陽鄉之地也魏文帝分平氏立義陽縣江

左省義陽縣地入平春縣晉孝武帝改平春曰平陽隋開

皇三年改平陽為義陽縣屬申州大業二年改屬義州皇

朝復屬申州



淮水西自唐州桐柏縣界流入東北經縣去縣三十七里故曹城在縣東三十八里梁將曹景宗將兵侵魏所築故平靖關城在縣南七十六里舊有此關不知何代創立接義陽有三關之塞此其一也武陽黃峴二關在安州應山縣界長老云此關因山為障不營濠隍故名平靖關

鍾山縣上 西至州四十里

本漢鄆縣也屬江夏郡宋永初屬義陽郡高齊於此置齊安郡後改為萬歲郡開皇三年罷郡為齊安縣乃屬申州四年以近鍾山改齊安為鍾山縣淮水經縣北四十里

澁水出縣南霸山去縣七十五里山石之間波流塞澁因以為名

石城在縣西南二十一里石城山上本晉義陽縣所理

羅山縣上 西南至州一百一十里

本漢鄆縣地梁武帝置西汝南郡於此開皇三年併入鍾山十六年於鍾山析置羅山縣屬申州武德四年置南羅州領羅山一縣八年州廢以縣屬申州羅山在縣西南九里

淮水經縣北去縣二十里

光州弋陽本屬淮南道貞元已後隸蔡州節度



開元戶二萬九千六百九十五  
元和戶一千九百九十

鄉六十一  
鄉六十二

禹貢揚州之域春秋時弦國之地魯僖五年楚人滅弦弦子奔黃在秦屬九江郡在漢為西陽屬江夏晉安帝立光城縣理於此梁末於縣置光州大業二年罷州為弋陽郡武德三年改為光州總管府貞觀元年為光州總管府大極元年自光山縣移今理

州境 東西四百四十三里 南北二百三十五里

八到 西北至上都一千七百里 東北至壽州四百三十里 西北至東都九百二十里 西南至申州二百六十里 東南至大別山三百里 西北至蔡州三百里

貢賦 開元貢賦 葛十疋 生石斛六十斤

管縣五 定城 殷城 固始 光山

仙居

定城縣 郭本漢弋陽縣屬汝南郡自漢至蕭齊韋為弋陽城武德三年置絃州領定城一縣貞觀元年省定城屬光州

淮水北去縣六十七里

黃國故城在縣西十二里春秋時黃國後為楚所滅

殷城縣 中北至州一百二十里 本漢期思縣地屬汝南郡宋僑立苞

信縣於此梁以苞信縣為義州隋開皇四年改苞信縣為



殷城縣屬弋陽郡武德三年重置義州以縣屬光州  
澮水在縣西五里

定城關在縣南四十里高齊以南迫陳境因置此關隋廢  
溫湯在縣南山中其湯綠色

固始縣 上 西南州一百五十五里

本漢封蓼侯之地春秋蓼國楚并之今縣城是也自東晉  
已後蓼縣省宋明帝失淮北地乃於僑立新蔡郡領固始  
一縣開皇七年改屬義州大業三年廢義州屬弋陽郡

淮水經縣北八十里

茹陂在縣東南四十八里建安中劉馥為揚州刺史典築

以水溉田

孫叔敖祠在縣西北隅七十五里

光山縣 上 北至州三十里

本漢西陽縣也屬江夏郡魏屬弋陽郡宋孝武帝大明初  
於此立光城縣隋開皇三年廢入樂安縣十八年又置光  
山縣

光山一名弋山在縣西北八十里

淮水經縣北七十里

木陵故關在縣南一百三十二里齊魏二境齊置此關以  
為禁防周因不改隋開皇九年平陳後廢



仙居縣中 東至州一百里

本漢軹縣春秋時強國楚滅之漢以為縣屬江夏郡至宋分立樂安縣天寶元年改為仙居縣縣西有仙居因以為名

谷水在縣北九里

軹縣故城在縣北四十里春秋時弦國之都也

仙堂上陂在縣西南十一里梁武大同元年百姓堰谷水為六陂以溉稻田

元和郡縣圖志卷第九

元和郡縣圖志卷第十

河南道六

淄青節度使管十二州 鄆州 兗州 青州

齊州 曹州 以後分入下卷 濮州 密州

海州 沂州 淄州 萊州 登州

鄆州 東平 大都督府 開元戶三萬三千三百八十七 鄉六十二

今為淄青節度理所 自曹州以下分入下卷

管州十二 鄆州 兗州 青州 齊州 曹州

濮州 密州 沂州 淄州 萊州

登州



禹貢兗州之域春秋時屬宋即魯附庸須句國音太昊之後風左傳曰公伐邾取須句戰國時其地屬魏秦為薛郡地在漢為東平國屬兗州後漢封皇子蒼是為憲王宋及後魏並為東平郡周宣帝於此置魯州尋廢隋分兗州萬安縣置鄆州大業三年罷州為東平郡隋亂陷賊武德五年討平徐圓朗於今鄆城縣置鄆州為總管府本理鄆城貞觀八年以下濕移理須昌貞元三年昇為都督府

州境東西一百八十七里南北二百六十四里  
 八到西南至上都九百八十五里西南至東都九百六十五里東北至齊州二百八十里東南至兗州一百九十里

貢賦開元貢賦  
西至曹州三百三十里北渡河至博州一百八十里  
綿絹一十五疋

管縣十 東平 須昌 陽穀 壽張 盧縣 東阿  
 鄆城 鉅野 平陰 中都

東平縣望郭下古宿國左傳曰公及宋人盟于宿是也後齊為無鹽地漢於此置宿昌縣屬東平郡縣理無鹽城隋別置須昌縣屬鄆州改漢須昌縣為宿城縣貞元三年移於州理改為東平縣

須昌縣望郭

本漢舊縣屬東郡故須句國按此前須昌縣在今縣東南



三十二里須昌故城是也隋改須昌爲宿城縣更立須昌縣於今理屬鄆州縣在州南四十五步

濟水南自鄆城縣界流入去縣西二里

州理故須句城左傳任宿須句顓臾皆風姓也注曰須句雖列國而削弱不能自通魯私屬若顓臾之比也

無鹽故城在縣東三十六里古宿國也列女傳曰無鹽有醜女名宿瘤齊宣王善之立爲夫人即此縣女也

清水石橋在縣西三里隋仁壽元年造石作華巧與趙州石橋相埒長四百五十尺

東平思王宇墓在東四十九里漢東平思王宇宣帝子後

薨葬於此其冢松柏皆西靡王奢侈生葬所愛幸者守冢者常聞號呼數年後乃不復聞聲

陽穀縣

上

東南至州七十五里

本漢須昌縣地隋於此置陽穀縣取東河縣界陽穀亭爲名也屬濟州天寶十三年濟州爲河所陷沒以縣屬鄆州黃河在縣北十二里

故伏城在縣東南二里蓋伏生所居因號之

壽張縣

緊

東北至州四十五里

本漢壽良縣地屬東郡後漢光武以叔父名良改曰壽張屬東平郡開皇三年罷郡屬濟州十六年割屬鄆州武德



四年屬壽州五年廢壽州屬鄆州

梁山在縣南三十五里漢書曰孝王北獵梁山是也壽州故城在縣東南十五里隋末百姓築以為堡武德四年於此置壽州

呂母垞在縣東南三十五里後漢東海呂母合衆於此兗州人謂城實中曰垞音直加友

盧縣縣東南至州一百里

本漢舊縣也屬泰山郡都尉理之濟北王所都後漢盧縣屬濟北國宋屬北郡開皇三年罷郡縣屬濟州大業三年復為濟北郡武德四年討平王充復為濟州按濟州理碣

礮城礮音若高反本秦東郡之茌平縣地也其城西臨黃河

晉末為河水所毀移理河北博州界事具博州宋元嘉二十年寧朔將軍王玄謨前鋒入河平礮立戍守之都督劉義恭以沙城不堪守召玄謨毀城而還後更城之後魏略得河南置鎮守八年於此置濟州至天寶十三載州為河所陷廢

礮津在縣北一里後魏於此置關名濟州關隋末廢劉公橋架濟水在縣東二十七里宋武帝伐燕過此造橋故俗呼為劉公橋隋末廢貞觀元年重造長十二丈闊一丈二尺



東阿縣縣南至州五十里

本漢舊縣也春秋時齊之柯地左傳曰公會齊侯盟於柯汪曰此柯今濟北東阿齊之柯邑猶祝阿也漢志東阿縣屬東郡都尉理晉屬濟北國開皇三年屬齊州天寶十三年濟州廢縣屬鄆州

魚山一名吾山在縣東南二十里瓠子歌曰吾山平兮巨野溢魚沸鬱兮迫冬日即此山也曹子建每登此山有終焉之志及亡葬於山下

穀城山在縣東三十二里黃石公出一編書與張良曰後十三年孺子見我濟北穀城山下黃石即我也其處焉

東阿故城在縣西二十里漢東阿縣城也晉太康後省魏志程昱謂范令靳允曰曹使君智殆天所授君必固范戍守東阿則田單之功可立謂此城也水經注曰東阿天井巨若輪深七八丈每歲取此井水煮膠入貢本草所謂阿膠也

陽穀亭在縣東南四十二里左傳齊桓公會諸侯于陽穀是也

項羽墓在縣東二十七里初羽爲魯公羽死後魯猶爲楚守漢王示以羽首魯乃方降羽死乃以公禮葬於此

鄆城縣縣東北至州一百里



本漢壽良縣地左傳曰晉人執季文子於茗丘還待於鄆  
 按古鄆城即今縣是也漢魏皆為壽張縣地開皇四年改  
 為萬安縣十六年於此置鄆城縣貞觀八年移鄆州於須  
 昌縣鄆城依舊

黎丘在縣西四十五里春秋時黎侯寓於衛因以為名黎  
 之臣子諷衛侯歸國作詩曰胡為乎泥中蓋惡其卑濕也

鉅野縣

望西北至州一百二十里

本漢舊縣也屬山陽郡鉅野澤在縣東五里即魯西狩獲  
 麟處武德四年於此置麟州其地以是獲麟之地故以為  
 名五年廢麟州以縣屬鄆

獲麟堆在縣東十二里春秋時十四年經曰西狩獲麟大  
 野澤一名鉅野在縣東五里南北三百里東西百餘里爾  
 雅十藪魯有大野西狩獲麟於此澤  
 蚩尤墓在縣東北九里今山陽鉅野縣有蚩尤肩髀冢按  
 黃帝殺蚩尤於涿鹿之野身體異處故別葬焉

平陰縣

上西南至州一百二十里

本漢肥城縣地屬泰山郡古肥子國開皇十四年於今縣  
 西北二十八里置榆山縣大業二年移於今理仍改名平  
 陰屬濟州天寶十三載州廢縣割隸鄆州  
 陶山在縣東三十五里范蠡葬處



黃河去縣十里

平陰故城在縣東北三十五里左傳曰晉侯伐齊齊侯禦諸平陰

故長城首起縣北二十九里齊湣王所築蘇代謂燕王曰齊有長城巨防足以爲塞是也

左丘明墓在縣東南五十五里

中都縣 上 西北至州一百里

一本中都在兗州之末本魯國邑也定公以孔子爲中都宰一年四方皆則之禮記曰夫子制於中都四寸之棺五寸之槨由中都宰爲司寇故城在今縣西三十九里一名

殷密城至漢以其地爲東平陸縣屬東平國齊高帝改平陸縣爲樂平縣隋復改樂平爲平陸縣屬兗州天寶元年改爲中都割屬鄆州今却隸兗州

汶水北去縣二十四里又北入須昌縣界

桓水在縣西八十里晉桓溫進軍北次金鄉鑿鉅野三百里以通舟運自清水入河以是所鑿故曰桓水亦曰桓河

兗州 魯郡都督府 開元戶六萬七千三百九十七 鄉一百三十三

禹貢兗州之域兼得徐州之地春秋時爲魯國按武王即位封周公於少昊之墟曲阜之地周公不就封留佐武王武王崩又相成王其子伯禽乃就封之魯自伯禽至頃公



三十四君為楚考烈王所滅六國時地屬楚秦滅楚以魯為薛郡漢高后時更為魯國後漢仍為魯國兗州所理不恒獻帝初平三年移兗州理濟陰之鄆城以魏太祖遭操為兗州牧魏仍移兗州理東郡之廩丘晉不改永嘉之後陷於石勒北州流人南渡成帝立南兗州寄理京口宋武平河南又得其地置兗州後又屬魏宋文帝元嘉八年理廣陵二十八年理貽賁二十年復理廣陵大業元年於兗州置都督府二年改為魯州三年改為魯郡十三年為賊徐圓朗所據武德五年討平圓朗改魯郡置兗州貞觀十四年改置都督府謹按禹貢導沂水東流為濟截河南渡東

與荷澤汶水會又東北入於海兗州在濟河之間因濟水發源為名今郡理乃非其境至周置兗州始兼得今郡之地而濟水自王莽末入河同流於海則河南之地無濟水矣自後所說皆習舊名

州境 東三百三十一里 西三百五十三里 南三百三十一里 北三百五十三里

八到 西南至上都一千八百九十五里 西北至宋州四百里 東至沂州三百八十里 西至曹州三百七十里

東南至徐州 西南至宋州 四百里

西北至鄆州 一百九十里 正北微東至齊州 三百三十里

貢賦 開元貢 鏡花綾二十疋 防風二十斤 綾絹綿



管縣十一

瑕丘

金鄉

魚臺

鄒縣

龔丘

乾封

萊蕪

曲阜

泗水

任城

中都見鄆州

瑕丘縣

郭上

郭下

本漢縣屬山陽郡即魯之負瑕邑也左傳曰季康子伐邾子益來囚諸負瑕宋元嘉十三年立兗州理瑕丘城而瑕丘無縣至隋文帝割鄒縣汶陽平原三縣界立瑕丘縣屬兗州

洙水東去縣二十三里

泗水東自曲阜縣界流入與洙水合

淮安王神通營在瑕丘故城中武德五年平賊徐圓朗屯兵之處也

又有管國公任環薛國公長孫順德原國公史萬寶壘列營相次各周迴五里

堯祠在縣東南七里洙水之西

金鄉縣

望

東北至州一百八十里

本漢東緡縣也屬山陽郡即古之緡國城左傳曰夏桀為仍之會有緡叛之陳留風俗傳曰東緡縣者故陽武戶牖鄉也漢丞相陳平即此鄉人也後漢於今兗任城縣西南七十五里置金鄉縣蓋因穿山得金故曰金鄉屬山陽國



武德四年於此置金州五年廢為戴州貞觀中廢戴州縣屬兗州

昌邑故城在縣西北四十二里其中城周十餘里外城周三十餘里中有鐵柱出池數尺漢景帝三年吳楚趙膠西濟南菑川膠東七國俱反天子命條侯周亞夫將三十六軍擊吳楚亞夫至淮陽問父客鄧都尉榮安出客曰莫若引兵東北壁昌邑以梁委吳將軍深溝高壘使輕兵絕淮泗口塞吳饗道吳梁相弊乃以全制其極破吳必矣條侯從之吳王以正月起三月皆破滅即此城也

魚臺縣 上 東北至州一百九十里

本漢方與縣屬山陽郡高齊文宣帝廢開皇 年復置方與縣屬戴州貞觀十七年廢戴州縣屬兗州寶應元年改為魚臺縣因縣北有魯君觀魚臺為名縣理城即漢方與地城也

荷水即濟水也一名五丈溝西自金鄉縣界流入去縣十里又東南流合泗水泗水東北自任城縣界流入經縣東與荷水合又東流入徐州沛縣界

觀魚臺即武唐亭也在縣北十三里隱五年公矢魚于棠是也

太山府君祠在縣西十二里



鄒縣上

本漢鄒縣地故邾國魯之附庸魯繆公改邾為鄒因鄒山以為縣大業二年改兗州為魯州三年罷魯州為魯郡縣皆屬焉武德五年罷縣屬兗州按邾國之地陸終之子曹姓所封即今鄒縣是也今黃州也又為國之地陸終之後所封蓋陸終有六子各為國也

嶧山一名鄒山在縣南二十二里禹貢曰嶧陽孤桐即此也始皇二十

六年觀禮于魯刻石于嶧山晉建武初兗州寄理山上洛陽傾覆邾鑿獲歸州鄉人士並宗附之遂共推鑿為主與千餘家避難于嶧山中宗假鑿龍驤將軍兗州刺史鎮鄒

山後為石勒所侵逼鑿率文武自嶧山奔下邳

鳧山在縣東南三十八里詩曰奄有鳧繹遂荒徐宅即此山也

龍龔丘縣中南至州五十里

本漢寧陽縣之地屬泰山郡後漢改屬東平國高齊文宣帝移置平原縣於漢寧陽縣城北十七里今縣理也隋以此縣與德州平原縣同名以縣東南二十里有龍龔丘城遂改平原為龍龔丘縣屬兗州

青石山在縣西三十里後魏有青石山祠即謂此也其山都是一大石耳發地傑立高四十餘丈周迴三里上有石



池二所東西行列有類人功冬夏澄清初無耗溢祈雨輒  
應故古今祀之

故汶陽城在縣東北五十四里其城側土田沃壤故魯號  
汶陽之田成二年齊歸我汶陽之田謂此地也

乾封縣上 西南至州一百六十里

本齊之博邑延陵季子適齊子死葬于嬴博之間至漢武  
帝封禪分嬴博二縣立奉高縣以奉山之祀後魏改博縣  
爲博平開皇十七年改博平爲博城縣乾封元年高宗封  
岳析長安以置乾封長安元年廢乃於岱山下改博城縣  
爲乾封縣屬兗州

泰山一曰岱宗在縣西北三十里

社首山在縣西北二十六里

高里山亦曰蒿里山在縣西北二十五里

徂來山亦曰尤來山詩曰徂來之松後漢赤眉渠帥樊崇  
保守此山自號尤來三老

汶水源出縣東北原山西南流經縣理南去縣三里又有  
北汶羸汶柴汶牟述征記曰太山郡水皆名汶按今縣界  
凡有五汶皆源別而流同也

開元十三年冬玄宗登封泰山登封之夕凝氛昏晦迅風  
激烈皇帝出齊宮露立以請及明清霽旗幡不搖事畢至



山下日又抱戴明曜五色千官稱賀其日大赦以靈岳昭感封太山神爲天齊王

岳廟在縣西北三十里泰山之南

萊蕪縣中 西南至州二百六十里

本漢縣也故城在今淄州東南六十里齊靈公滅萊萊人流播邑落荒蕪故曰萊蕪後漢范史雲曾爲此縣長百姓歌其清儉曰甑中生塵范史雲釜中生魚范萊蕪至晉廢後魏移古羸縣於此貞觀元年廢入博城縣至長安四年又於廢羸縣置萊蕪縣取漢舊名也屬兗州韶山在縣西北二十里其山出鐵漢置鐵官至今鼓鑄不

絕

曲阜縣上 西北至州四十五里

本漢魯縣即春秋時魯國伯禽所都其地即古炎帝之墟也自後或爲魯國或爲魯郡而縣屬焉高齊文宣帝省魯郡仍於魯城置任城郡開皇三年罷郡仍移汶陽縣理此屬兗州十六年改汶陽縣爲曲阜縣

防山在縣東二十五里禮記曰孔子旣得合葬於防此是也

壽丘在縣東北六里皇甫謐以爲黃帝生於壽丘在魯城東門之北



齊和郡縣志 卷之七  
曲阜在縣理魯城中委曲長七八里今按季子臺及大庭氏庫及縣理城並在其上

洙泗二水東自泗水縣界流入又曲南流經縣北分爲二流水側有一城爲二水之分會也南爲泗水北爲洙水二水之間即夫子領徒之所居也

沂水亦名雩水源出縣東南八里坳澤俗名連泉澤在縣東九里魯僖公牧馬之地詩曰駟駒牡馬在坳之野是也  
闕里在縣西南三里魯城中北去洙水百餘步

兩觀在縣東南五十步定二年雉門及兩觀災即家語孔子戮少正卯之處也

矍相圃在縣西三里魯城中

孔子墓在縣西北三里魯城之北

靈光殿魯王所造在魯城內按文選漢景帝子名發封爲魯王好理宮室而建此殿遭王莽亂宮室被焚建章皆墮壞而靈光殿巋然獨存

泗水縣 上 西南至州一百里

本漢卞縣之地即春秋之靈疇地漢爲卞縣之地隋分汶陽縣於此城置泗水縣屬兗州

尼丘山在縣南五十里叔梁紇禱尼丘山而生孔子

梁父山在縣北八十里西按徂萊山封禪書曰古者封泰



山禪梁父七十二家

龜山在縣東北七十五里詩曰奄有龜蒙定十一年左傳曰齊人來歸龜陰之田是也

泗水源出縣東陪尾山其源有四四泉俱導因以為名

盜泉源出縣東陪北高徑山之陰淮南子曰孔子不飲泉

漏澤在縣東七十里此澤漏冗有五皆方丈餘深二丈已上其澤每夏積水秋冬漏竭將漏之時居人知之不過三日漏水都盡先以竹木作簿籬圍之水族山積也

菟裘故城在縣北五十五里魯隱公曰使營菟裘吾將老焉

焉

任城縣

緊

東至州七十六里

本漢縣也屬東平國古任國大昊之後風姓也僖二十一年左傳曰任宿須句皆風姓也注曰任今任城縣也魏志曰文帝封鄆陵侯彰為任城王齊天保七年移高平郡於此任城縣屬焉開皇三年罷高平郡屬兗州

承注山在縣東南七十六里云女媧生處按今山下有女媧廟

媧廟

桓公溝源出縣理西四十里崩山之下宋武北征記曰桓公宣武以太和四年率眾平趙魏時遣冠軍將軍毛彪生



鑿此溝號曰桓公溝於今四十九年矣溝已填塞公遣寧朔將軍朱超更鑿石通之

女媧陵在縣東南三十九里

魏王粲墓在縣南五十二里

青州

北海望

開元戶五萬五千一百三十一

鄉一百二

古少昊氏之墟禹貢青州之地舜時以青州越海遼遠分為營州禹復置九州武王尅商封師尚父於齊營丘周成王少時命太公曰東至于海西至于河南至于穆陵北至于無棣穆陵山在今瑯琊沂水縣界無棣今景城郡屬縣也五侯九伯實得征之至二十九代為田和所篡和子孫強盛與燕趙韓魏楚俱

稱王五世至建為秦所滅分齊地置瑯琊二郡漢元年東

更為臨淄項羽立田都為王都臨淄其年四月田榮擊都

走楚榮自立為王十二月楚擊榮榮走平原項羽立田假

為王榮弟橫擊假假走楚楚立田廣為王三年韓信殺廣

漢立韓信為齊王王五年信徙王楚六年以膠東等七十

餘城封皇子肥為齊王傳國至厲王昌國除武帝復封次

子閔為齊王後國除遂以齊為郡領縣十二理臨淄後漢

改齊郡為齊國曹魏明帝封子芳為齊王尋即帝位晉武

帝以弟攸為王子冏嗣永嘉末陷於石勒其後南燕慕容

德建都於此至慕容超宋武帝伐尅之以沈文秀為青州



刺史守東陽城為後魏將慕容白曜所陷遂入後魏大業三年罷州為北海郡領縣十隋亂陷賊武德二年海岱平定改為青州置總管府

州境東西二百七十里南北三百四十四里

八到西南至上都二千四百五里西南至東都一千五百五十五里東北至萊州三百四十五里東至密州三百三十里

東北至萊州三百四十五里東至密州三百三十里

南至沂州四百五十里西北至棗州三百二十里

貢賦開元貢賦 仙文綾 棗 糖 海物

管縣七 益都 臨淄 千乘 臨朐

北海 壽光 博昌

益都縣望郭下

本漢廣固縣之地魏於今壽光縣南十里益都城置益都

縣屬齊國宋及後魏屬齊郡開皇三年罷郡縣屬青州

淄水西去縣五十五里

廣固城在縣西四里晉永嘉五年東萊年平人曹嶷為刺

史所築有大澗甚廣固故謂之廣固初南燕慕容德議所

都尚書潘聰曰青齊沃壤號東秦土方二千里四塞之固

負海之饒可謂用武之國廣固者曹嶷之所營山川阻峻

足為帝王之都德從之及義熙五年宋武征慕容超於廣

固也城側有五龍口險阻難攻兵力疲弊河間人玄文說



裕曰昔趙攻曹疑望風者以爲澠水帶城非可攻拔若塞五龍口城當必陷石季龍從之疑請降後五日大雨震雷復開徙舟嶧陽冉閔之亂段龕據之慕容恪攻圍數月不尅又塞五龍口龕遂降後無幾又震開之今舊基猶存宜試修塞裕從之超及城中男女皆悉脚弱病者大半超遂出奔爲晉所擒

臨淄縣

縣

南至州四十里

古營丘之地呂望所封齊之都也太公後二十九代康公爲田和所滅和立爲齊侯後稱王五代至王建爲秦所滅秦立爲縣城臨淄水故曰臨淄自漢至後魏並屬齊郡高

齊省開皇十六年移高陽縣理此改爲臨淄縣屬青州

社山在縣西北二十五里一名愚公山愚公谷在山之陰

牛山在縣南二十五里昔齊景公遊牛山北望而歎曰美哉國乎古而無死將何去此晏子對曰古而無死則太公丁公之樂也君何與於此哉

營丘在縣北百步外城中爾雅曰水出其前經其左曰營丘今臨淄城中有丘淄水出其前經其左故曰營丘葵丘在縣西北二十里桓公會諸侯于葵丘



縣理即古臨淄城也漢齊郡亦理于此蘇秦說齊王曰臨淄城中七萬戶戶不下三人即二十一萬人又燕王謂蘇秦曰吾聞齊地清濟濁河可以爲固巨防可以爲塞漢書田肯曰夫齊東有瑯琊即墨之饒南有太山之固懸隔千里持戟百萬齊得十二焉北東秦也非子弟勿王漢六年封皇子肥爲齊王盡得故齊地人能齊言者悉與之

齊雪宮故址在縣東北六里晏子春秋所謂齊侯見晏子于雪宮也

天齊池在縣東南十五里封禪書曰齊之所以爲齊者以天齊池也

齊桓公墓在縣東南二十三里鼎定山上貞觀十一年詔致祭禁二十步內不令樵蘇

管仲墓在縣南二十三里

晏嬰墓在縣東北三里貞觀十一年詔十五步並禁樵蘇

千乘縣 上 東南至州八十里

本漢舊縣也屬千乘國有鹽官後漢和帝永元七年改千乘國爲樂安郡千乘縣仍屬焉武德二年於此置乘州八年廢乘州千乘依舊屬青州千乘者以齊景公有馬千馬四畋于青丘今縣北有青丘縣因以爲名

淄水南去縣二十八里



臨朐縣

上

北至州四十里

本漢縣也屬齊郡縣東有朐山因取為名開皇六年改為逢山縣屬青州取縣西逢山為名大業二年又改為臨朐縣

朐山在縣東南二里

逢山在縣西二十二里

破車峴在縣東南三十五里按峴高七十丈周迴二十里道徑險惡因名破車峴

北海縣

緊

西北至州一百三十里

本漢平壽縣也屬北海郡隋開皇三年罷郡置下密縣於

廢郡中屬青州十六年又於此置濰州取界內濰水為名

大業二年廢濰州仍改下密縣為北海縣

海水在縣東北一百二十里禹貢曰海岱惟青州今按海

接萊州西接壽光縣界

濰水南去縣五十五里

膠水東去縣八十五里與萊州膠水縣中分為界

公孫弘墓在縣西

壽光縣

緊

西南至州七十里

本漢舊縣也屬北海郡後漢改屬樂安郡宋為壽光縣隋開皇六年於縣北一里博昌故城置壽光縣屬青州武德



二年屬乘州八年廢乘州還屬青州

海水在縣東北一百十里東接北海縣界西接博昌縣界  
淄澗二水西自千乘縣界流入去縣四十里

博昌縣 上 東南至州一百二十里

本漢舊縣屬千乘國昌水其勢平博故曰博昌後漢千乘  
國為樂安郡博昌縣仍屬焉晉宋後魏並同高齊省仍自  
今縣東十二里樂陵故縣移樂陵縣理此屬樂安郡隋開  
皇三年罷郡樂陵縣屬青州十六年改為博昌縣

濟水北去縣百步又東北流入海

海浦在縣東北二百八里即濟水 流入海之處水口謂

之海浦

薄姑故城在東北六十里齊舊都也

齊州

上 齊郡

開元戶四萬九千一百五十七

禹貢兗州之域春秋及戰國時屬齊國秦併天下為齊郡  
漢分齊郡立濟南國今州即濟南國之歷城縣理也景帝  
三年為齊南郡理東平陵屬青州晉永嘉之後郡移理歷  
城即今州理是也後為石勒所據慕容氏亦有其地義熙  
五年劉裕平之宋元嘉九年分青州立冀州理歷城後魏  
將慕容白曜攻下歷城文帝改冀州為齊州與濟南郡並  
理隋開皇十三年罷郡以所領縣屬齊州大業三年罷州



為齊郡隋末陷于寇賊武德元年海岱平定罷郡復州

州境東西南北三百八十二里

八到西南至上都二千一百五里

東至淄州一百九十里

西渡河至博州二百九十里

正南微西至兗州三百三十里

東北渡河至棣州三百五十里

正北微西至德州二百四十五里

貢賦開元貢賦

絲綿葛

管縣九

歷城

全節

章丘

亭山

臨邑

臨濟

長清

豐齊

禹城

歷城縣上郭下古齊歷下城對歷山之下漢為歷城縣屬齊

南國晉屬南郡開皇三年罷濟郡縣屬齊州華不注山一

名華山在縣東北十五里齊晉戰于鞍齊敗績晉逐之三

周華不注

州理城古歷下城也左傳晉平公伐齊戰於歷漢書酈食

其說齊王田廣罷歷下軍守備韓信度平原襲破歷城因

入臨淄述征記曰歷城到營城三十里自城以東水瀾漫

數十里南則迫山實為險固也

神通寺在縣東七十里琨瑞山中符秦時沙門竺僧朗隱

居也朗少事佛圖澄尤明氣緯隱於此谷因謂之朗公谷



全節縣上 州七 西 南 至 十里 本春秋譚國之地齊滅之漢以為

東平陵縣屬濟南郡宋省東字後魏為東陵至周省其全

節縣本是隋末土人李滿率鄉人據堡贍以家財武德二

年歸國於堡置譚州及平陵縣以滿為譚州總管貞觀元

年廢譚州縣屬齊州十七年燕亮構逆滿及男君球固守

賊平縣廢有詔重置縣改名全節以旌其功焉

濟水在縣北四十里

巨合城在縣東南一十三里耿弇討張步守巨里即此城

也

章丘縣上 本漢陽丘縣也屬濟南郡高齊文宣天保七年

自高唐故城移高唐縣理於此開皇十八年以博州亦有

高唐縣改為章丘縣屬齊州取縣南章丘山為名也武德

二年屬譚州貞觀元年廢譚州又屬齊州

東陵山在縣南二十八里莊子曰盜跖死於東陵之上龍

盤山在縣東二十五里上有神跡是姜源所履處長白山

在縣東南三十里高二千九百丈周迴六十里濟水西去

縣十七里

縣理城即黃巾城也在濟水之南岸漢獻帝建安中黃巾

賊張角之所守也

亭山縣上 州九 西 北 至 十里 本漢平陵縣地宋於此置衛國縣屬



頓丘郡開皇六年改爲亭山縣屬齊州縣東南有亭山因以爲名

長白山在縣東北六十里齊記曰於陵城西三里有長白山陳仲子夫妻所隱也

百脉水出縣東北平地水源方百餘步百泉俱出合流故名之

臨邑縣上南至州六十里本漢舊縣也屬東郡至晉屬濟北國宋

孝武帝孝建二年立東魏郡理臺城以臨邑縣屬焉開皇三年罷郡臨邑縣屬齊州武德二年屬譚州貞觀元年廢譚州屬齊州

黃河在縣北七十里

濟水西去縣四十里

漯水北去縣七里

鹿角關在縣西北七十里大業三年廢

臨濟縣上西南至州一百二十里本漢管縣屬濟南郡開皇六年

移朝陽縣理於此屬濟州十六年改爲臨濟縣

黃河在縣北八十里

濟水在縣南二十里

長清縣上東北至州八十里本漢盧縣地開皇五年於此置鎮十

四年廢鎮置長清縣屬濟州因清水爲名貞觀十七年廢



濟州屬臨濟州縣

隔馬山在縣東南三十五里左傳曰晉侯伐齊齊帥遁風沙衛斬馬於隘以塞道後因為隔馬山

黃河北去縣五十五里

濟水北去縣十里

清水西南去縣十里

涓溝泊在縣西南五里東西三十里南北二十五里水族

生焉數州取給

廢四口關在縣西南五十里後魏置武德九年廢

石窰故城在縣東三十里

豐齊縣

上東北至州四十里

本漢荏縣也取縣東北荏山為名屬

泰山郡大業二年省入歷城縣武德元年重置天寶元年改為豐

岐陽山縣東南五十里

濟水西去縣二十六里

祝阿故城在縣東北二里禮記曰武王剋殷封黃帝之後於祝即謂此也

禹城縣

上東南至州一百五十里

本漢祝阿縣春秋時齊邑漢以為

縣屬平原郡開皇十六年改屬濟州天寶元年改名禹城縣以縣西南三十里有禹息故城因而為名在州西北八





元和郡縣志

卷十

十五

十五里

元和郡縣圖志卷第十





程